

## 每週經課朗誦經文(巴克禮漢羅/教羅)2014/07/27

### 共同經課 - 1

#### 創世記二十九章十五節~二十八節

15 拉班 kā 雅各講，你雖然是我 ê 親戚，kiám thang 白白做我 ê 工；請 kā 我講，你 beh 甚麼工錢。16 拉班有兩個 cha-bó-kiáⁿ，大 ê 名叫利亞，細 ê 名叫拉結。17 利亞目睷 khah 輸，拉結生做好看。18 雅各疼拉結，就講，我願為 tiòh 你細 ê cha-bó-kiáⁿ 拉結，kā 你做工七年。19 拉班講，將伊嫁 hō 你，khah 好 hō 別人；你 kap 我 toà。20 雅各就為 tiòh 拉結 kā 伊做工七年；因為深疼伊，看做 kúi-nā 日。21 雅各對拉班講，日期已經滿，求你將我 ê bó hō 我，我 thang kap 伊同房。22 拉班聚集 hit 所在 ê 眾人，辦筵席請 in。23 到日暗，拉班將伊 ê cha-bó-kiáⁿ 利亞，送來 hō 伊；雅各就 kap 伊同房。24 拉班將伊 ê 女婢 Sek-phàⁿ hō 伊 ê cha-bó-kiáⁿ 利亞做女婢。25 到天光，一下看見是利亞，就對拉班講，你 kā 我做 ê，是甚麼？我 kā 你做工，kiám-m̄ 是為 tiòh 拉結 mah？你啥事騙我？26 拉班講，未嫁大 ê 事先嫁細 ê，tī 阮 chia 無人 án-ni 做。27 你 kap chit-ê tiòh 滿七日；阮就將 hit-ê 亦嫁 hō 你；你為 tiòh 伊 koh kā 我做工七年。28 雅各就照 án-ni 行；kap chit-ê 滿七日；伊就將伊 ê cha-bó-kiáⁿ，拉結，hō 伊做 bó。

### 共同經課 - 2

#### 詩篇一百零五篇一節~十一節，四十五 b 節

1 Lín tiòh 感謝耶和華，求叫伊 ê 名； Tī 萬百姓 ê 中間報揚伊 ê 所做。2 Tiòh òng 伊詩，òng 伊唱歌 o-ló，談論伊一切奇妙 ê 所行。3 Tiòh 因為伊 ê 聖名來誇口； Chhē 耶和華 ê 人，心內 tiòh 歡喜。4 Tiòh 求耶和華 kap 伊 ê 權能；常常 chhē 見伊 ê 面。5 伊 ê 奴僕亞伯拉罕 ê 後裔，伊所揀雅各 ê kiáⁿ 孫 ah，Lín tiòh siàu 念伊所做奇妙 ê 事，Kap 伊 ê 神跡，kap 伊 ê 嘴判斷 ê 話。6 b 7 伊是耶和華，咱 ê 上帝；全地 lóng 有伊 ê 判斷。8 伊記念伊 ê 約，直到永遠；伊所吩咐 ê 話，直到千代；9 就是 kap 亞伯拉罕所立 ê 約，對以撒所 chhiù ê choā。10 伊 koh 將 chit-ê 約對雅各定 tiòh 做律例；對以色列定 tiòh 做永遠 ê 約。11 講，我 beh 將迦南地賞賜你，做你產業 ê 份額。45 Lín tiòh o-ló 耶和華。

### 共同經課 - 3

#### 羅馬書八章二十六節~三十九節

26 Koh 聖神也親像 án-ni 扶持咱 ê 軟 chiaⁿ；因為咱 m̄ 知影 tiòh 怎樣祈禱照所應該 ê；獨獨聖神家己用 boē 講出 ê 吐氣替咱求。27 監察人 ê 心 ê 也知聖神 ê 意思，因為伊照上帝 ê 意思來替聖徒求。28 Koh 咱知萬項事 saⁿ-kap 來 hō 疼上帝 ê 人得 tiòh 利益，就是照伊定 tiòh ê 旨意來受召 ê。29 因為伊所事先知 ê，就事先定 tiòh in kap 伊 ê Kiáⁿ ê 像同款，hō 伊 tī choē-choē 兄弟 ê 中間做大 kiáⁿ。30 Koh 所事先定 tiòh ê，就召 in；所召 ê，就稱 in 做義；所稱做義 ê，就 hō in 有榮光。31 論到 chiah-ê 事咱 beh 怎樣講？上帝若為咱，chī-chūi 會對敵咱？32 伊既然無惜家己 ê Kiáⁿ，為 tiòh 咱眾人獻伊，kiám 無續將萬物白白 hō 咱 mah？33 Chī-chūi beh 告上帝所揀 ê 百姓 ah？稱 in 做義 ê 是上帝；34 chī-chūi 定 in ê 罪 ah？基督耶穌已經死，尚且 tui 死人中 koh 起來，坐 tī 上帝 ê 大 pêng，也替咱祈禱。35 Chī-chūi beh 隔斷咱 tī 基督 ê 疼？或是患難，或是困苦，或是 khún-tiòk，或是 iau 餓，或是 thng-theh，或是危險，或是利刀 ah？36 親像所記載，講，阮為 tiòh 你 ê 緣故終日受死，看做親像 beh thài ê 羊。37 反 tng tī chiah-ê lóng 總 ê 事，咱 tui 疼咱 ê，得勝到有 chhun。38 因為我深信無論是死，是活，是天使，是掌權 ê，是現今 ê，是將來 ê，有權能 ê，39 是高，是深，á 是別個受造 ê 物，lóng boē 會隔斷咱 tī 上帝 ê 疼，就是 tī 咱 ê 主基督耶穌所有 ê 疼。

### 共同經課 - 4

#### 馬太福音十三章三十一節~三十三節，四十四節~五十二節

31 Koh 設譬喻對 in 講，天國親像一粒芥菜子，人 thèh 去亦 tī 伊 ê 園；32 chit-ê 是百項種子 ê 第一細；到伊大叢，是 khah 大 lóng 總 ê 菜蔬，續成做樹，致到空中 ê 鳥來歇 tī 伊 ê 枝。33 Koh 用譬喻 kā in 講，天國親像酵，婦人人 thèh 去 khng tī 三斗麵粉 ê 內面，到 lóng 發酵。44 天國親像寶貝 khng tī 園裡；人 tú-tiòh 就 khng 密伊；因為歡喜 chiah 去賣一切所有 ê，來買 hit khu 園。45 Koh 天國親像 seng-lí 人 chhē 好 ê 珠；46 tú-tiòh 一粒不止值錢 ê，就去賣一切所有 ê 來買伊。47 Koh 天國親像網拋 tī 海裡，聚集 tàk 類 ê 水族；48 已經滿，就拖上坪(phiàⁿ)；坐 teh，拾好 ê 入器具，m̄ 好 ê hiat-kák tī 外面。49 世界 ê 路尾，亦 beh án-ni；chiah-ê 天使 beh 出來，tui 義人 ê 中間來分別 pháⁿ 人；50 hiat in tī 火爐，tī hia beh 有啼哭咬牙切齒。51 Chiah-ê lín lóng 會曉得 boē？In 講，會。52 伊 kā in 講，所以見若經學士做天國 ê 學生 ê，是親像家主 tui 伊 ê 庫房 thèh 出新舊 ê 物 ê。